



Na osnovu člana 22 Statuta Brčko distrikta Bosne i Hercegovine – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta Bosne i Hercegovine, na 52. redovnoj sjednici održanoj 12. oktobra 2011. godine, usvaja

## **ZAKON O ORUŽJU I MUNICIJI U BRČKO DISTRIKTU BOSNE I HERCEGOVINE**

### **DIO PRVI – OSNOVNE ODREDBE**

#### **Član 1**

##### **(Predmet zakona)**

Ovim zakonom propisuju se uslovi za nabavljanje, držanje, nošenje, sakupljanje, popravljanje i prepravljanje, oduzimanje oružja i municije, promet oružja i municije, način postupanja sa oružjem i municijom, osnivanje i vođenje civilnog strelišta i evidencije o oružju i municiji na teritoriji Brčko distrikta Bosne i Hercegovine (u daljnjem tekstu: „Distrikt“).

#### **Član 2**

##### **(Definicije)**

Pojedini pojmovi upotrijebljeni u ovom zakonu imaju sljedeća značenja:

- a) „oružje“ je naprava izrađena ili prilagođena da pod pritiskom zraka, barutnih i drugih plinova ili drugog potisnog sredstva može izbaciti zrno, kuglu, sačmu ili neki drugi projektil, odnosno raspršiti plin ili tečnost te druge naprave koje su namijenjene za samoodbranu, lov ili sport i bitni dijelovi oružja;
- b) „bitni dijelovi oružja“ su: cijevi sa ležištem metka, ulošci-adaptori za vatreno oružje sa olučenim i neolučenim cijevima, zatvarači, navlake, bubanj kod revolvera i rukohvati sa mehanizmom za okidanje;
- c) „municija za vatreno oružje“ je cjeloviti metak koji sjedinjuje čahuru, kapislu, barutno punjenje i zrno ili sačmu;
- d) „vatreno oružje“ su sve vrste pušaka, pištolja i revolvera, kao i sve vrste naprava koje pod pritiskom barutnih plinova izbacuju kroz cijev zrno, kuglu, sačmu ili druge projektele;
- e) „zračno oružje“ su sve vrste pušaka, pištolja, revolvera i druge naprave koje pod pritiskom zraka izbacuju kroz cijev zrno, dijabolu, kuglicu ili druge projektele;
- f) „plinsko oružje“ su puške, pištolji i revolveri i druge naprave koje pod pritiskom barutnih plinova ili sabijenog plina raspršuju nadražljive tvari;
- g) „oružje za signalizaciju“ su pištolji, revolveri, puške i druge naprave koje pod pritiskom energije barutnog punjenja ispaljuju naboj namijenjen isključivo za izazivanje glasnog pucnja ili ispaljivanju svjetleće signalne zvjezdice;

- h) „hladno oružje“ su bodeži, kame, mačevi, sablje, bajoneti i skakavci čije se sječivo nalazi pod pritiskom sabijene opruge, a iz drške iskače pritiskom na dugme ili polugu ili metalne zvjezdice za bacanje, bez obzira na dužinu oštrice, bokseri, buzdovani, te drugo oružje sa skrivenom oštricom kao i drugi predmeti kojima je osnovna namjena napad;
- i) „oružje s tetivom“ su lukovi, samostreli i druge naprave koje snagom napete tetive ili druge elastične materije potiskuju strijelu ili drugi projektil;
- j) „lovačko oružje“ je vatreno oružje kategorije B sa kojim se smije loviti divljač u skladu s propisima o lovstvu;
- k) „sportsko oružje“ je vatreno oružje kategorije B, zračno oružje i oružje sa tetivom koje se koristi za sportske discipline u skladu s posebnim propisima;
- l) „trofejno oružje“ je vatreno, zračno i hladno oružje koje se čuva kao uspomena ranijeg perioda historije Bosne i Hercegovine ili za njegovog vlasnika predstavlja ličnu ili porodičnu uspomenu, a koje je od ovlaštene organizacije ili ovlaštenog pojedinca trajno onesposobljeno za upotrebu;
- m) „staro oružje“ je hladno i vatreno oružje koje ima historijsku vrijednost, oružje koje čini sastavni dio narodne nošnje, kao i vojno i policijsko oružje koje je dotrajalo i neupotrebljivo, oružje koje je sastavni dio vojnih i policijskih paradnih odora, oružje koje se puni s usta cijevi crnim barutom, a pali kremenom, fitiljem ili kapislom i koje je od ovlaštene organizacije ili ovlaštenog pojedinca trajno onesposobljeno za upotrebu;
- n) „automatsko oružje“ je oružje kod kojeg je jednokratnim pritiskom na obarač moguće ispaliti više metaka;
- o) „poluautomatsko oružje“ je oružje koje je nakon ispaljivanja svakog metka ponovno spremno za ispaljivanje i kod kojeg je iz cijevi jednokratnim pritiskom obarača moguće ispaljivati jedan metak;
- p) „oružje s repetirajućim mehanizmom“ je oružje kod kojeg je nakon ispaljivanja svakog metka potrebno ručno pomoću mehanizma ubaciti metak u cijev;
- r) „oružje za jedinačnu paljbu“ je oružje bez spremnika-magacina koje se svaki put prije ispaljivanja metka puni ručno ubacivanjem metka u ležište cijevi ili ležište punjenja koje se nalazi na kraju cijevi;
- s) „vatreno oružje kratke cijevi“ je oružje čija cijev nije duža od 30 cm, a ukupna dužina ne prelazi 60 cm, osim ako posebnim zakonom nije drugačije propisano;
- t) „oružje za ličnu sigurnost“ čine pištolji i revolveri iz člana 2 stava 1 tačke d) ovog zakona, kalibra 4,8 mm i veći;
- u) „električni paralizatori“ su ručne naprave koje pomoću visokog električnog napona privremeno onesposobljavaju osobu;
- v) „sprej za omamljivanje“ je naprava kojom se usmjereno izbacuju u vidu mlaza ili pjene neškodljive nadražljive tvari za onesposobljavanje pojedinca i koje na ljudsko zdravlje imaju kratkotrajan učinak;
- z) „optički nišan“ je naprava kojom se oružju povećava preciznost;
- aa) „registrovano oružje“ je oružje za koje je izdata odgovarajuća isprava o oružju;
- bb) „registracija oružja“ je unos podataka o oružju i vlasniku, odnosno korisniku oružja u službene evidencije propisane ovim zakonom, kao i propisima donesenim na osnovu ovog zakona, uz izdavanje odgovarajuće isprave;
- cc) „vlasnik oružja“ je fizičko ili pravno lice kome je izdata odgovarajuća isprava o oružju;
- dd) „ovlašteni trgovac oružjem“ je pravno lice ili preduzetnik koji posjeduje odobrenje nadležnog organa za bavljenje prometom oružja i municije;
- ee) „vatreno oružje duge cijevi“ označava oružje čija dužina cijevi prelazi 30 cm, odnosno oružje čija ukupna dužina sa cijevi prelazi 60 cm;
- ff) „minsko-eksplozivna sredstva“ su sve vrste bombi, mina, granata i drugih naprava opremljenih s eksplozivnom materijom ili detonatorom (težina, udar, potez, trenje,

- hemijska reakcija, električna energija i sl.) kod kojih dolazi do oslobađanja energije i njihovog rasprskavanja;
- gg) „municija“ je punjenje za vatreno oružje;
  - hh) „lažna municija“ je municija bez oštrog ili ubojitog naboja kojom se postiže efekat pucnja;
  - ii) „municija sa prodirućim zrnima“ je municija namijenjena za vojnu upotrebu kod koje se zrno nalazi u čahuri i ima prodiruće tvrdo jezgro;
  - jj) „municija sa eksplozivnim zrnima“ je municija za vojnu upotrebu kod koje zrno sadrži punjenje koje eksplodira pri udaru;
  - kk) „municija sa zapaljivim zrnima“ je municija za vojnu upotrebu kod koje zrno sadrži hemijsku smjesu koja se zapali pri kontaktu sa zrakom ili na udar;
  - ll) „civilno strelište“ je objekat namijenjen sportsko-rekreativnom gađanju koji ispunjava tehničke i sigurnosne uslove za upotrebu registrovanog ili prijavljenog oružja;
  - mm) „imitacija oružja“ su predmeti koji su vanjskim izgledom slični ili jednaki oružju, ali ih nije moguće upotrijebiti niti prepraviti u vatreno oružje;
  - nn) „dekorativno oružje“ je oružje koje je izrađeno u dekorativne svrhe i nije ga moguće upotrijebiti ili prepraviti u vatreno oružje;
  - oo) „onesposobljavanje vatrenog oružja“ je onesposobljavanje svih bitnih dijelova oružja na način da njihovim uklanjanjem, zamjenom ili izmjenom ne može biti omogućeno njegovo osposobljavanje;
  - pp) „popravljanje oružja“ je otklanjanje kvarova na oružju i zamjena ili ugradnja originalnih dijelova;
  - rr) „prepravljanje oružja“ je prilagođavanje oružja drugoj municiji, zamjena ili ugradnja bitnih dijelova oružja i drugi zahvati na oružju kojima se utiče na njegovo funkcionisanje ili na tehnička svojstva;
  - ss) „prenošenje oružja“ je premještanje oružja, za koje je izdat oružni list, s jednog mjesta na drugo;
  - tt) „promet oružja i municije“ je nabavljanje oružja i municije radi prodaje, smještaj i čuvanje oružja i municije u svrhu prodaje, prodaja oružja i municije na malo i veliko u Distriktu;
  - uu) „mužari-prangije“ su ručne ili samostojeće naprave namijenjene za izazivanje glasnog pucnja, koje su konstruisane tako da ne mogu primiti cjeloviti naboj, pune se s usta cijevi određenom količinom crnog baruta i pale štapinom, kremenom i kapislom, a zatvaraju sredstvom male specifične težine;
  - vv) „reprodukcije oružja“ su kopije dugog i kratkog vatrenog oružja, koje se pune s usta cijevi crnim barutom i pale fitiljem, kremenom ili kapislom;
  - zz) „posebna oprema za vatreno oružje“ je svaki mehanizam namijenjen kao dodatak za osnovni model oružja, čijom primjenom se mijenjaju mogućnosti kod upotrebe oružja, osim optičkog nišana.

### **Član 3** **(Primjena)**

- (1) Fizička i pravna lica mogu nabavljati, držati i nositi oružje i municiju samo po odredbama ovog zakonom.
- (2) Odredbe ovog zakona u pogledu nabavljanja, držanja i nošenja oružja i municije odnose se i na strane državljanke sa stalnim boravkom na teritoriji Distrikta.

(3) Odredbe ovog zakona ne odnose se na pripadnike agencija, organa i institucija u Bosni i Hercegovini, koji nabavljaju i nose oružje i municiju u skladu sa svojim propisima, a djeluju na teritoriji Distrikta.

#### **Član 4** **(Izuzeci od primjene Zakona)**

U smislu ovog zakona ne smatra se oružjem:

- a) dekorativno oružje;
- b) imitacije oružja;
- c) oružje koje je trajno onesposobljeno za upotrebu tehničkim postupcima koji su određeni posebnim propisima;
- d) oružje koje je namijenjeno za alarmiranje, signalizaciju, spašavanje života i usmrćivanje životinja;
- e) podvodne puške i drugi predmeti koji snagom opruge, napete gume ili sabijenog plina izbacuju osti ili harpun koji su isključivo namijenjeni ribolovu;
- f) oružje koje se koristi u industrijske ili tehničke svrhe pod uslovom da može biti korišteno samo za te navedene svrhe;
- g) municija za zračno oružje;
- h) municija za oružje s tetivom i lažna municija.

#### **Član 5** **(Primjena Zakona o upravnom postupku Brčko distrikta Bosne i Hercegovine)**

Na sva pitanja postupka koja nisu uređena ovim zakonom primjenjuju se odredbe Zakona o upravnom postupku Brčko distrikta Bosne i Hercegovine.

## **DIO DRUGI – ORUŽJE I MUNICIJA**

### **POGLAVLJE I. KATEGORIZACIJA ORUŽJA**

#### **Član 6** **(Kategorizacija oružja)**

Oružje se, prema ovom zakonu, razvrstava u četiri kategorije:

- a) kategorija A, koju čine:
  - 1) vojni projektili s eksplozivnim punjenjem;
  - 2) automatsko vatreno oružje;
  - 3) vatreno oružje koje je kamuflirano tako da izgleda kao neki drugi predmet;
  - 4) municija s probojnim, eksplozivnim, obilježavajućim ili zapaljivim projektilima, te projektili za takvu municiju;
  - 5) municija za pištolje i revolvere s projektilom koji ima ekspanzijski učinak i projektili za takvu municiju, osim municije za lov ili sportsko streljaštvo za lica kojima je dozvoljeno da koriste to oružje;
  - 6) minsko-eksplozivna sredstva i dijelovi;
  - 7) oružje koje je izrađeno ili prerađeno bez odobrenja za promet oružjem, osim oružja iz kategorije C alineja 3;
  - 8) poluautomatsko vatreno oružje za civilnu upotrebu, koje po svom autentičnom izgledu odgovara automatskom oružju;
  - 9) ostalo vatreno oružje koje nije obuhvaćeno kategorijama B, C ili D;

- 10) posebna oprema za vatreno oružje.
- b) kategorija B, koju čine:
- 1) poluautomatsko ili repetirajuće vatreno oružje kratke cijevi;
  - 2) vatreno oružje kratke cijevi za jedinačnu paljbu sa središnjim paljenjem;
  - 3) vatreno oružje kratke cijevi za jedinačnu paljbu s rubnim paljenjem;
  - 4) lovačko i sportsko poluautomatsko dugocijevno vatreno oružje koje zajedno s magacinom i ležištem može primiti više od tri metka;
  - 5) poluautomatsko vatreno oružje duge cijevi s magacinom i ležištem za najviše tri metka, kod kojeg se magacin, odnosno opruga za punjenje može skinuti, odnosno nije sigurno da li je oružje napravljeno tako da se uz obični alat može prepraviti u oružje s magacinom i ležištem za više od tri metka;
  - 6) repetirajuće i poluautomatsko vatreno oružje duge cijevi s glatkom cijevi ukupne dužine do 60 cm;
  - 7) repetirajuće vatreno oružje duge cijevi koje nije obuhvaćeno u alineji 6 ove tačke;
  - 8) vatreno oružje duge cijevi za jedinačnu paljbu s jednom ili više užlijebljenih cijevi;
  - 9) vatreno oružje duge cijevi za jedinačnu paljbu s jednom ili više glatkih cijevi;
  - 10) poluautomatsko vatreno oružje duge cijevi koje nije obuhvaćeno alinejama 4, 5, 6 i 7 ove kategorije;
  - 11) staro i trofejno oružje.
- c) kategorija C, koju čine:
- 1) plinsko oružje;
  - 2) reprodukcija vatrenog oružja kod kojeg se ne upotrebljava jedinstveni naboj;
  - 3) mužari.
- d) kategorija D, koju čine:
- 1) zračno oružje;
  - 2) električni paralizatori;
  - 3) raspršivači, odnosno sprejevi;
  - 4) oružje s tetivom;
  - 5) hladno oružje.

## **Član 7** **(Ograničenja)**

- (1) Oružje iz člana 6 ovog zakona se u pogledu prava i obaveza vlasnika oružja, razvrstava u:
- a) zabranjeno oružje:
    - 1) oružje kategorije A,
    - 2) hladno oružje kojem je osnovna namjena napad ili nanošenje ozljeda,
    - 3) hladno oružje kada se nosi na javnim mjestima;
  - b) dozvoljeno oružje za koje je potrebna odgovarajuća isprava o oružju kategorije B;
  - c) dozvoljeno oružje za koje je potrebna prijava Policiji:
    - 1) oružje kategorije C,
    - 2) zračno oružje,
    - 3) električni paralizatori;
  - d) dozvoljeno oružje za koje nije potrebno odobrenje niti prijava Policiji:
    - 1) raspršivači, odnosno sprejevi;
    - 2) oružje s tetivom;
    - 3) hladno oružje, osim hladnog oružja navedenog u tački a) ovog stava.
- (2) Zabranjeno je nabavljanje, držanje ili nošenje oružja kategorije A.

- (3) Zabranjeno je nabavljanje, držanje ili nošenje oružja kategorije B bez odgovarajuće isprave o oružju.
- (4) Zabranjeno je nabavljanje, držanje ili nošenje oružja kategorije C i zračnog oružja i električnih paralizatora iz kategorije D bez odgovarajuće isprave o oružju.
- (5) Oružje kategorije D mogu nabavljati, držati i nositi lica starija od 18 godina, a izuzetno raspršivač, odnosno sprej mogu držati i nositi lica starija od 16 godina.

## **POGLAVLJE II. NABAVLJANJE ORUŽJA I MUNICIJE I ISPRAVE O ORUŽJU**

### **Član 8 (Isprave)**

Isprave o oružju prema ovom zakonu su:

- a) odobrenje za nabavku oružja;
- b) odobrenje za nabavku municije;
- c) oružni list;
- d) dozvola za nošenje;
- e) odobrenje za držanje oružja;
- f) odobrenje za sakupljanje i držanje starog oružja;
- g) odobrenje za držanje trofejnog oružja;
- h) potvrda o prijavi.

### **Član 9 (Zahtjev)**

- (1) Zahtjev za izdavanje odobrenja za nabavku oružja podnosi se na propisanom obrascu Policiji Brčko distrikta Bosne i Hercegovine (u daljnjem tekstu: „Policija“).
- (2) Obrazac zahtjeva za izdavanje odobrenja za nabavku oružja utvrđuje šef Policije pravilnikom.

### **Član 10 (Uslovi za izdavanje odobrenja za nabavku oružja fizičkom licu)**

- (1) Policija izdaje fizičkom licu odobrenje za nabavku oružja ukoliko ispunjava opće i posebne uslove.
- (2) Opći uslovi za izdavanje odobrenja za nabavku oružja fizičkom licu su da:
  - a) je navršilo 21 godinu života;
  - b) ima opravdani razlog za nabavku oružja;
  - c) nije osuđivano za krivično djelo ili da se protiv lica ne vodi krivični postupak, osim za krivična djela protiv sigurnosti javnog saobraćaja;

- d) nije kažnjavano za prekršaj protiv javnog reda i mira, prekršaj propisan Zakonom o oružju i municiji ili nasilje predviđeno drugim zakonom, kao i da se protiv tog lica ne vodi postupak za takve prekršaje;
  - e) ne postoje okolnosti koje negativno utiču na javni red i mir, odnosno interese sigurnosti, kao i da ne postoje druge okolnosti koje ukazuju da bi oružje moglo biti zloripotrijebljeno;
  - f) ne postoje druge okolnosti koje ukazuju da bi oružje moglo biti zloripotrijebljeno, kao što je: prekomjerno uživanje alkohola, konzumacija opojnih droga ili drugih omamljujućih sredstava, izraženo poremećeni porodični odnosi, sukobi s okolinom, agresivno i eksczesno ponašanje i drugi poremećaji u ponašanju, kriminalističko- obavještajni razlozi i razlozi koji ukazuju na povezanost sa licima iz kriminalističko-obavještajne evidencije i slično.
- (3) Posebni uslovi za izdavanje odobrenja za nabavku oružja fizičkom licu su da:
- a) je zdravstveno sposobno za držanje i nošenje oružja;
  - b) raspolaze tehničkim znanjem i vještinom za pravilnu upotrebu oružja i da poznaje propise koji se odnose na držanje i nošenje oružja;
  - c) ima uslove za siguran smještaj i čuvanje oružja.
- (4) Izuzetno od stava 2 tačke a) ovog člana, odobrenje za nabavku oružja može se izdati i licu iz člana 3 stava 3 ovog zakona, sa navršenih 18 godina života za vrijeme aktivne službe i članovima sportskih streljačkih udruženja koji se aktivno takmiče u streljaštvu.
- (5) Šef Policije formira komisiju za odlučivanje po podnesenom zahtjevu za nabavku, držanje i nošenje oružja i municije koja ocjenjuje opravdanost zahtjeva za nabavku, držanje i nošenje oružja i municije.
- (6) Način rada komisije iz stava 5 ovog člana utvrđuje se Pravilnikom koji donosi šef Policije.

## **Član 11**

### **(Utvrđivanje uslova za izdavanje odobrenja za nabavku oružja fizičkom licu)**

- (1) Fizičko lice ima opravdan razlog za nabavku oružja ukoliko se utvrdi da je njegova lična sigurnost ugrožena ili bi mogla biti ugrožena u tolikoj mjeri da mu za njegovo osiguranje treba oružje ili ukoliko zbog naravi posla ili okolnosti u kojim ga obavlja postoji potreba za nabavkom oružja.
- (2) Fizičko lice ima opravdani razlog za nabavku lovačkog oružja ukoliko je član lovačkog društva i ukoliko ima položen lovački ispit, što se dokazuje uvjerenjem o članstvu u lovačkom društvu i uvjerenjem o položenom lovačkom ispitu.
- (3) Fizičko lice ima opravdani razlog za nabavku sportskog oružja ukoliko je član sportske streljačke organizacije, što se dokazuje uvjerenjem sportske streljačke organizacije čiji je član.
- (4) Postojanje uslova iz člana 10 stava 2 tačke c) ovog zakona dokazuje se na osnovu uvjerenja Osnovnog suda Brčko distrikta BiH (u daljnjem tekstu: „Osnovni sud“) i uvjerenja organa nadležnog za vođenje kaznenih evidencija.

- (5) Radi utvrđivanja uslova iz člana 10 stava 2 tački b) i e) ovoga zakona, policijski službenik ovlašten je da traži i prikuplja podatke i informacije od građana o podnosiocu zahtjeva za nabavku oružja o čemu sastavlja službenu zabilješku.
- (6) Postojanje uslova iz člana 10 stava 2 tačke d) ovoga zakona utvrđuje se provjerom u prekršajnoj evidenciji u Policiji.

## **Član 12**

### **(Dostavljanje dokaza o ispunjavanju posebnih uslova)**

- (1) Policija dostavlja obavještenje podnosiocu zahtjeva koji ispunjava opće uslove iz člana 10 stava 2 ovog zakona, da u roku od 60 dana dostavi dokaze o ispunjavanju posebnih uslova iz člana 10 stava 3 tački a) i b) ovog zakona.
- (2) U roku iz stava 1 ovog člana policijski službenik neposrednim opažanjem u stambenom i drugom prostoru gdje se oružje drži, utvrđuje postojanje uslova iz člana 10 stava 3 tačke c) o čemu sačinjava službenu zabilješku.

## **Član 13**

### **(Dokazi o zdravstvenoj sposobnosti za držanje i nošenje oružja)**

- (1) Postojanje uslova iz člana 10 stava 3 tačke a) ovoga zakona podnosilac zahtjeva dokazuje uvjerenjem o zdravstvenoj sposobnosti za držanje i nošenje oružja, a lice iz člana 3 stava 3 ovog zakona, potvrdom nadležnog organa o zaposlenju.
- (2) Uvjerenje i potvrda iz stava 1 ovog člana ne mogu biti stariji od šest mjeseci od dana izdavanja.
- (3) Uvjerenje iz stava 1 ovog člana izdaje nadležna zdravstvena ustanova.
- (4) Gradonačelnik na prijedlog šefa Odjeljenja za zdravstvo i ostale usluge (u daljnjem tekstu: „šef Odjeljenja“) donosi odluku kojom se propisuje sastav tima zdravstvenih radnika i zdravstvenih saradnika, koji su neophodni u postupku za izdavanje ljekarskih uvjerenja licima koja nabavljaju oružje i municiju.
- (5) Šef Odjeljenja donosi pravilnik o utvrđivanju zdravstvene sposobnosti za nabavljanje, držanje i nošenje oružja, kojim utvrđuje kriterije za provjeru zdravstvene sposobnosti iz člana 10 stava 3 tačke a).

## **Član 14**

### **(Promjene zdravstvene sposobnosti)**

Zdravstvena ustanova, ljekar i građanin koji ima saznanja o promjeni zdravstvenog stanja vlasnika oružja, a koja može uticati na sposobnost za držanje i nošenje oružja, dužni su odmah po saznanju za takvu promjenu obavijestiti Policiju.



## **Član 15**

### **(Dokazi o tehničkom znanju i vještini za pravilnu upotrebu oružja)**

- (1) Ispunjavanje uslova iz člana 10 stava 3 tačke b) ovog zakona, za oružje kategorije B podnosilac zahtjeva dokazuje potvrdom o položenom ispitu o osposobljenosti za pravilno držanje, nošenje i rukovanje oružjem.
- (2) Izuzetno od stava 1 ovog člana, lice iz člana 3 stava 3 ovog zakona, za vrijeme aktivne službe ili nakon odlaska u penziju, uslove dokazuje ispravom o zaposlenju, odnosno o prestanku radnog odnosa zbog ispunjavanja uslova za penziju.
- (3) Stručna ovlaštena organizacija za obuku u rukovanju vatrenim oružjem može biti streljačka, odnosno druga organizacija i ustanova koja raspolaže potrebnim prostorom, strelištem, stručnim kadrom i koja ispunjava propisane uslove za provođenje obuke i posjeduje odobrenje Policije.
- (4) Potvrdu iz stava 1 ovog člana izdaje Komisija za provjeru znanja o pravilnom držanju, nošenju i rukovanju oružjem koju imenuje šef Policije.
- (5) Šef Policije donosi pravilnik o programu obuke i načinu osposobljavanja za pravilno rukovanje, držanje i nošenje oružja.

## **Član 16**

### **(Rješavanje o zahtjevu fizičkog lica za izdavanje odobrenja za nabavku oružja)**

- (1) Odobrenje za nabavku oružja izdaje se fizičkom licu koje ispunjava uslove iz člana 10 ovog zakona.
- (2) O izdavanju odobrenja iz stava 1 ovog člana odlučuje šef Policije rješenjem.

## **Član 17**

### **(Uslovi za izdavanje odobrenje za nabavku oružja pravnom licu i preduzetniku)**

- (1) Odobrenje za nabavku oružja može se izdati pravnom licu i preduzetniku koji ispunjavaju sljedeće uslove:
  - a) da imaju opravdani razlog za nabavku oružja;
  - b) da odgovorno lice i lice zaduženo za sigurnost ispunjava opće i posebne uslove iz člana 10 ovog zakona, izuzev uslova iz stava 3 tačke c) člana 10 ovog zakona;
  - c) da ima prostor za siguran smještaj i čuvanje oružja u skladu s pravilnikom.
- (2) Opravdani razlog za nabavku oružja ima pravno lice i preduzetnik koji je registrovan kod Osnovnog suda za obavljanje djelatnosti lova, uzgoja divljači, sportskog streljaštva, vođenje civilnih strelišta, obavljanje poslova fizičke zaštite, osposobljavanja lica za pravilnu upotrebu vatrenog oružja, naučnog istraživanja za koje je potrebno oružje, kao i pravno lice koje ima uspostavljenu unutrašnju službu za zaštitu ljudi i imovine u skladu s važećim propisima.

- (3) Pravno lice i preduzetnik iz stava 2 ovog člana koji je registrovan za obavljanje djelatnosti lova i uzgoja divljači, za dobijanje odobrenja za nabavku oružja mora ispunjavati i uslove određene propisima o lovstvu Distrikta.
- (4) Način i uslove za siguran smještaj i čuvanje oružja i municije utvrđuje šef Policije pravilnikom.

### **Član 18**

#### **(Rješavanje o zahtjevu pravnog lica)**

- (1) Odobrenje za nabavku oružja izdaje se pravnom licu i preduzetniku koji ispunjava uslove iz člana 17 ovog zakona.
- (2) O izdavanju odobrenja iz stava 1 ovog člana odlučuje šef Policije rješenjem.

### **Član 19**

#### **(Ograničenja posjedovanja oružja)**

- (1) Fizičko lice može imati najviše jedan pištolj, jedan revolver i pet komada lovačkog oružja za koje su mu izdate isprave o oružju.
- (2) Pravno lice i preduzetnik, osim agencije i unutrašnje službe za zaštitu lica i imovine, može posjedovati vatreno oružje čiji broj zavisi od potrebe i broja zaposlenih lica koja imaju potrebu za korištenje oružja.
- (3) Agencija i unutrašnja služba za zaštitu lica i imovine može posjedovati oružje čiji je broj propisan Zakonom o agencijama i unutrašnjim službama za zaštitu lica i imovine.
- (4) Pravno lice i preduzetnik, rukovanje i korištenje oružja može povjeriti samo punoljetnom licu koje ispunjava uslove propisane članom 10 stavom 2 tačkama c), d) i e), stavom 3 tačkama a) i b) i stavom 4.

### **Član 20**

#### **(Žalba)**

- (1) Protiv rješenja iz članova 16 i 18 ovog zakona, podnosilac zahtjeva može izjaviti žalbu Apelacionoj komisiji Brčko distrikta Bosne i Hercegovine (u daljnjem tekstu: „Apelaciona komisija“) u roku od 15 dana od dana prijema rješenja.
- (2) Protiv rješenja donesenog po žalbi ne može se voditi upravni spor.

### **Član 21**

#### **(Važenje odobrenja)**

- (1) Policija izdaje odobrenje za nabavku oružja fizičkom i pravnom licu sa rokom važenja od šest mjeseci od dana izdavanja.
- (2) Odobrenje za nabavku oružja koje nije iskorišteno u roku iz stava 1 ovog člana fizičko ili pravno lice dužno je vratiti Policiji u roku od osam dana od dana isteka roka važenja.

## **Član 22**

### **(Registracija oružja i izdavanje oružnog lista i odobrenja za držanje oružja)**

- (1) Fizičko lice koje je nabavilo oružje na osnovu odobrenja za nabavku oružja dužno je Policiji podnijeti zahtjev za registraciju oružja i izdavanje oružnog lista u roku od osam dana od dana nabavke.
- (2) Pravno lice i preduzetnik koji je nabavio oružje na osnovu odobrenja za nabavku oružja dužan je Policiji podnijeti zahtjev za izdavanje odobrenja za držanje oružja u roku od osam dana od dana nabavke.
- (3) Policija za registrovano oružje fizičkom licu izdaje oružni list.
- (4) Policija za registrovano oružje pravnom licu i preduzetniku izdaje odobrenje za držanje oružja.
- (5) Obrazac i sadržaj obrasca oružnog lista i dozvole za nošenje oružja utvrđuje šef Policije pravilnikom.

## **Član 23**

### **(Odbijanje izdavanja oružnog lista i odobrenja za držanje oružja)**

- (1) Oružni list i odobrenje za držanje oružja ne može se izdati za:
  - a) oružje za koje se ne može dokazati porijeklo,
  - b) oružje koje prije stavljanja u promet nije označeno žigom ili obilježeno u skladu sa Zakonom o ispitivanju, žigosanju i obilježavanju vatrenog oružja i municije,
  - c) ako nisu ispunjeni uslovi iz člana 10 stava 2 tački c), d) i e) i stava 3 tačke a).
- (2) U slučaju iz stava 1 tački a) i b) ovog člana šef Policije donosi rješenje kojim odbija zahtjev iz člana 22 ovog zakon i oduzima oružje i odobrenje za nabavku oružja, bez prava na naknadu.
- (3) Oružje oduzeto u skladu sa stavom 2 ovog člana uništava Policija.
- (4) U slučaju iz stava 1 tačke c) ovog člana postupit će se u skladu s članom 50 ovog zakona.
- (5) Žalba ne odgađa izvršenje rješenja.
- (6) Protiv rješenja donesenog po žalbi ne može se voditi upravni spor.

## **Član 24**

### **(Rješavanje o zahtjevu za nošenje oružja)**

- (1) Fizičko lice koje želi da nosi oružje za ličnu sigurnost za koje ima oružni list podnosi Policiji pismeno obrazloženi zahtjev za nošenjem oružja.
- (2) O zahtjevu iz stava 1 ovog člana šef Policije odlučuje rješenjem.

- (3) Fizičko lice kome je odobreno nošenje oružja dužno je Policiji podnijeti zahtjev za izdavanje dozvole za nošenje oružja za ličnu sigurnost u roku od osam dana od dana prijema rješenja iz stava 2 ovog člana.
- (4) Policija će rješenjem odbiti zahtjev za izdavanje odobrenja za nošenje oružja fizičkom licu koje je podnijelo zahtjev za nošenje oružja ukoliko se ocijeni da to ugrožava interese sigurnosti ili ukoliko se preduzimanjem redovnih i dodatnih mjera Policije može osigurati odgovarajuća zaštita tog lica.
- (5) Protiv rješenja iz stava 4 ovog člana može se izjaviti žalba Apelacionoj komisiji u roku od 15 dana od dana prijema rješenja.
- (6) Protiv rješenja donesenog po žalbi ne može se voditi upravni spor.

## **Član 25**

### **(Važenje i produženje isprava o oružju)**

- (1) Oružni list i odobrenje za držanje oružja izdaje Policija sa rokom važenja od pet godina.
- (2) Rok važenja dozvole za nošenje oružja traje do isteka roka važenja oružnog lista na osnovu kojeg je dozvola izdata.
- (3) Vlasnik oružja kojem je izdat oružni list, dozvola za nošenje oružja, odnosno odobrenje za držanje oružja, dužan je u roku od 30 dana prije isteka roka iz stava 1 ovog člana, podnijeti zahtjev za produženje važenja isprave o oružju.
- (4) Vlasnik oružja uz zahtjev iz stava 3 ovog člana prilaže dokaze o:
  - a) ispravnosti oružja, izdatog od pravnog lica ili preduzetnika registrovanog za popravljavanje i prepravljavanje oružja;
  - b) ispunjavanju uslova u pogledu zdravstvene sposobnosti za držanje i nošenje oružja.
- (5) Vlasnik lovačkog i sportskog oružja uz zahtjev iz stava 3 ovog člana pored dokaza iz stava 4 ovog člana prilaže i dokaz da je član lovačke, odnosno streljačke organizacije.
- (6) Prilikom produženja isprava o oružju iz stava 3 ovog člana Policija utvrđuje da li vlasnik oružja ispunjava uslove propisane članom 10 stavom 2 tačkama c), d) i e) i člana 17 ovog zakona.
- (7) Ukoliko u roku iz stava 3 ovog člana ne podnese zahtjev za produženje važnosti isprava o oružju vlasnik oružja je dužan nakon isteka navedenog roka oružje, municiju i isprave o oružju predati Policiji.

## **Član 26**

### **(Odobrenje za nabavku municije)**

- (1) Policija može izdati odobrenje za nabavku municije fizičkom, odnosno pravnom licu koje ima oružni list, odnosno odobrenje za držanje oružja.
- (2) Zahtjev za izdavanje odobrenja iz stava 1 ovog člana podnosi se Policiji.

- (3) Odobrenje iz stava 1 ovog člana Policija fizičkom licu izdaje jednom u toku kalendarske godine najviše za 50 komada municije.
- (4) Izuzetno od stava 3 ovog člana, fizičkom licu koje ima opravdan razlog za nabavku municije može se odobriti nabavka dodatne količine municije.
- (5) Odobrenje iz stava 1 ovog člana izdaje se pravnom licu i preduzetniku koje je registrovano za obavljanje djelatnosti lova, popravke i prepravke oružja, vođenja civilnog strelišta i sportskoj streljačkoj organizaciji koja je upisana u registar udruženja.
- (6) Odobrenje za nabavku municije izdaje se sa rokom važenja od šest mjeseci.
- (7) Odobrenje za nabavku municije koje nije iskorišteno u roku iz stava 6 ovog člana fizičko ili pravno lice dužno je vratiti Policiji u roku od osam dana od isteka roka važenja.
- (8) Izuzetno, municija se može nabaviti bez odobrenja za nabavku municije u slučaju:
  - a) za puške sa neolučenim cijevima na osnovu oružnog lista,
  - b) za zračno oružje na osnovu potvrde o prijavi.

## **Član 27**

### **(Odobrenje za sakupljanje i držanje starog i odobrenje za držanje trofejnog oružja)**

- (1) Odobrenje za sakupljanje i držanje starog i odobrenje za držanje trofejnog oružja izdaje Policija na zahtjev fizičkog i pravnog lica na neodređeno vrijeme.
- (2) Policija izdaje odobrenja iz stava 1 ovog člana fizičkom licu koje ispunjava uslove iz člana 10 ovog zakona.
- (3) Policija izdaje odobrenja iz stava 1 ovog člana pravnom licu i preduzetniku koji ispunjava uslove propisane članom 17 ovog zakona.
- (4) Ispunjavanje uslova iz stavova 2 i 3 ovog člana utvrđuje Komisija za utvrđivanje prostornih i tehničkih uslova smještaja oružja i municije, koju imenuje šef Policije.
- (5) Oružje koje se drži na osnovu odobrenja iz stava 1 ovog člana ne smije se nositi, upotrebljavati niti se za njega smije nabavljati, držati ili praviti municija.
- (6) Oružje iz stava 1 ovog člana smije se prodati ili predati samo fizičkom ili pravnom licu kojem je izdato odobrenje iz stava 1 ovog člana, o čemu je fizičko i pravno lice dužno obavijestiti Policiju u roku od osam dana od dana nabavke, odnosno prodaje ili predaje.
- (7) Vatreno oružje koje je onesposobljeno za upotrebu ne smije se osposobljavati.
- (8) Izuzetno, muzeji uz staro oružje mogu sakupljati i oružje kategorije A koje se više ne izrađuje ili koje ne upotrebljavaju oružane snage ili Policija, pod uslovom da je trajno onesposobljeno.

**Član 28**  
**(Oružje sa obavezom prijavljivanja Policiji)**

- (1) Fizičko lice starije od 18 godina i pravno lice može bez odobrenja Policije nabavljati i držati oružje kategorije C, zračno oružje i električne paralizatore iz kategorije D.
- (2) Lice iz stava 1 ovog člana koje nabavi oružje kategorije C, zračno oružje i električne paralizatore iz kategorije D, dužno je prijaviti Policiji u roku od osam dana od dana nabavke na propisanom obrascu i uz prijavu dostaviti dokaz o porijeklu oružja.
- (3) Za prijavljeno oružje Policija izdaje potvrdu o prijavi.
- (4) Fizičko i pravno lice koje posjeduje registrovano lovačko ili sportsko oružje može nabaviti optički nišan za to oružje bez odobrenja Policije.
- (5) Lice iz stava 4 ovog člana dužno je prijaviti nabavku, otuđenje ili nestanak optičkog nišana najkasnije u roku od 10 dana od dana otuđenja ili nestanka.
- (6) Ovlašteni trgovac oružjem dužan je prodaju oružja iz stava 2 ovog člana i prodaju optičkog nišana iz stava 4 ovog člana prijaviti Policiji u roku od osam dana od dana prodaje.
- (7) Izgled i sadržaj obrasca za prijavu oružja i potvrde o prijavljenom oružju iz stavova 2 i 3 ovog člana i obrasca za prijavu optičkog nišana iz stava 4 ovog člana utvrđuje pravilnikom šef Policije.

**POGLAVLJE III. POSTUPANJE S ORUŽJEM I MUNICIJOM**

**Član 29**  
**(Prodaja i onesposobljavanje oružja i municije)**

- (1) Oružje i municija se može prodati ili predati samo fizičkom ili pravnom licu koje ima odobrenje za nabavku oružja i municije.
- (2) Ovlašteni trgovac za promet oružja i municije dužan je o prodaji oružja i municije koje se nabavlja na osnovu odobrenja za nabavku oružja i municije obavijestiti Policiju u roku od osam dana od dana prodaje.
- (3) Fizičko i pravno lice iz stava 1 ovog člana dužno je o prodaji oružja obavijestiti Policiju i odjaviti oružje u roku od osam dana od dana prodaje.
- (4) Zamjena vatrenog oružja između vlasnika može se izvršiti samo ako oružni listovi glase na istu vrstu vatrenog oružja.
- (5) Lica koja zamijene oružje dužna su u roku od osam dana od dana sklapanja ugovora o zamjeni obavijestiti Policiju i podnijeti zahtjev za registraciju oružja.

- (6) Fizičko lice koje posjeduje oružje za koje je izdat oružni list, može takvo oružje trajno onesposobiti za upotrebu kod preduzetnika ili pravnog lica koje ima odobrenje za obavljanje djelatnosti popravke, prepravke i onesposobljavanja oružja.
- (7) Ovlašteno lice koje je izvršilo onesposobljavanje oružja izdaje odgovarajuću potvrdu.
- (8) Troškove onesposobljavanja oružja snosi vlasnik oružja.
- (9) Vlasnik oružja dužan je prijaviti trajno onesposobljeno oružje Policiji u roku od osam dana od dana onesposobljavanja uz dostavu potvrde iz stava 7 ovog člana, radi poništenja oružnog lista.
- (10) Vatreno oružje koje je onesposobljeno za upotrebu ne smije se osposobljavati.

### **Član 30** **(Postupanje s oružjem i municijom)**

- (1) Sa oružjem i municijom mora se postupati s naročitom pažnjom.
- (2) Naročita pažnja u postupanju s oružjem i municijom podrazumijeva propisno čuvanje, pravilno, stručno i pažljivo rukovanje, nošenje, prenošenje i držanje u ispravnom stanju.

### **Član 31** **(Nošenje oružja)**

- (1) Oružje za ličnu sigurnost ne smije se nositi bez dozvole za nošenje oružja.
- (2) Vlasnik ili korisnik koji ima pravo nošenja oružja dužan je nositi oružje na način kojim se ne ugrožava lična sigurnost i sigurnost drugih lica.
- (3) Vlasnik ili korisnik oružja kojem je izdat oružni list može prenositi oružje samo radi popravljavanja, prepravljavanja, onesposobljavanja ili upotrebe na strelištu, pod uslovom da je oružje rasklopljeno, ukoliko je to tehnički moguće, ili da je municija fizički odvojena od oružja, u odgovarajućim navlakama ili kovčezima.
- (4) Van lovišta, odnosno strelišta vatreno i zračno oružje mora se držati, odnosno nositi u odgovarajućim futrolama i kovčezima i ne smije biti napunjeno.
- (5) Zabranjeno je nošenje vatrenog, zračnog i hladnog oružja na javnim, vjerskim i sportskim okupljanjima, u školama, zdravstvenim i javnim ustanovama, ugostiteljskim objektima i prostorima koji se koriste za pružanje ugostiteljskih usluga, kao i na drugim mjestima ili objektima gdje je javno istaknuta zabrana o nošenju oružja.
- (6) Fizičko lice ne smije nositi oružje kada je pod uticajem alkohola, opojnih droga ili drugih omamljujućih sredstava, odnosno kada je u takvom stanju da nije u mogućnosti shvatiti značenje svog postupanja, odnosno vladati svojom voljom.
- (7) Oružje se ne smije nositi na javnom mjestu na način kojim se može izazvati osjećanje fizičke ugroženosti, uznemirenosti i negodovanje građana.

- (8) Odredba stava 5 ovog člana ne odnosi se na sportsko oružje u slučaju kada se ono nosi radi takmičenja u gađanju.

**Član 32**  
**(Čuvanje oružja i municije)**

- (1) Oružje i municija čuvaju se na način da nisu dostupni drugim licima, posebno djeci, zaključani i odvojeni u metalnom ormaru, drvenom ormaru, sefu ili sličnom spremištu, koje se ne može otvoriti alatom uobičajene upotrebe.
- (2) Oružje i municija čuvaju se u stambenom ili drugom odgovarajućem prostoru koji se nalazi u mjestu prebivališta, odnosno sjedišta vlasnika oružja i municije.
- (3) Vlasnik oružja koji oružje drži na osnovu oružnog lista, odnosno odobrenja za držanje oružja, dužan je na poziv Policije donijeti oružje na pregled.
- (4) Način i uslove za siguran smještaj i čuvanje oružja i municije utvrđuje šef Policije pravilnikom.

**Član 33**  
**(Dotrajalo oružje)**

- (1) Vlasnik oružja čije je oružje dotrajalo da njegova upotreba može ugroziti sigurnost ljudi, a ne postoji mogućnost da se oružje popravi ili prepravi, dužan je takvo oružje predati Policiji.
- (2) Oružje iz stava 1 ovog člana prima se uz izjavu vlasnika da oružje predaje bez naknade.
- (3) Vlasnik oružja iz stava 1 ovog člana može onesposobiti oružje kod pravnog lica ili preduzetnika ovlaštenog za popravljavanje i prepravljavanje oružja i dužan je podnijeti zahtjev za izdavanje odobrenja za držanje trofejnog oružja.
- (4) Oružje iz stava 1 ovog člana kao i bitni dijelovi oružja uništavaju se u skladu s odredbama ovog zakona.

**Član 34**  
**(Postupci s oružjem i municijom u slučaju napuštanja mjesta prebivališta)**

- (1) Vlasnik oružja i municije koji napušta mjesto prebivališta ili boravišta na vrijeme duže od šest mjeseci, dužan je oružje i municiju predati na čuvanje fizičkom licu koje posjeduje odgovarajuću ispravu za tu vrstu oružja ili ovlaštenom trgovcu oružjem.
- (2) Vlasnik oružja i municije dužan je o predaji oružja i municije na čuvanje obavijestiti Policiju u roku od osam dana od dana predaje.

**Član 35**  
**(Rukovanje i upotreba oružja)**



- (1) Vlasnik oružja dužan je oružje održavati u ispravnom stanju, pravilno i s posebnom pažnjom rukovati oružjem.
- (2) Zabranjena je upotreba oružja na javnom mjestu i drugim mjestima na kojima se upotrebom oružja može ugroziti sigurnost ljudi i objekata te narušiti javni red i mir.
- (3) Lovačko oružje se ne smije upotrebljavati izvan lovišta ili civilnih strelišta.
- (4) Sportsko oružje se ne smije upotrebljavati izvan civilnih i sportskih strelišta.
- (5) Izuzetno od odredbe stava 4 ovog člana, zračno oružje i luk se smiju upotrebljavati i na mjestima koja su po svom položaju ili po preduzetim mjerama osiguranja takva, da se ne može ugroziti sigurnost građana.
- (6) Oružje je zabranjeno davati na upotrebu djeci.
- (7) Izuzetno od stava 6 ovog člana, zračno oružje ili luk mogu se dati na upotrebu djeci starijoj od 11 godina na sportskim strelištim i na drugim mjestima određenim i uređenim za vježbe gađanja pod nadzorom trenera koji ispunjava uslove iz člana 10 ovog zakona i uslove propisane posebnim propisom o sportu.
- (8) Električni paralizatori i raspršivači, odnosno sprejevi iz kategorije D, upotrebljavaju se samo za samoodbranu i na način da se time ne ugrožava sigurnost drugih lica.

### **Član 36**

#### **(Povjeravanje nošenja oružja i municije)**

- (1) Pravno lice i preduzetnik koje posjeduje oružje i municiju u skladu s članovima 17 i 18 ovog zakona, može povjeriti nošenje oružja i municije fizičkom licu koje obavlja poslove zaštite i koje ispunjava uslove propisane članom 10 stavom 2 tačkama a), c) i d) i stavom 3 tačkama a) i b) istog člana.
- (2) Fizičko lice iz stava 1 ovog člana, oružje i municiju koje mu je povjereno, može nositi samo za vrijeme obavljanja poslova zaštite i oružje ne smije nositi van objekta ili područja koje se osigurava ili čuva.
- (3) Izuzetno od odredbe stava 2 ovog člana, čuvari usjeva i šuma, čuvari lovišta i ribolovišta koji ne stanuju na području koje čuvaju, mogu nositi oružje i izvan tog područja do svog mjesta stanovanja, a lica koja osiguravaju imovinu koja se prevozi ili prenosi, mogu nositi oružje prilikom osiguranja te imovine.
- (4) Pravno lice iz stava 1 ovog člana izdaje potvrdu fizičkom licu kome povjerava oružje i o tome je dužno obavijestiti Policiju u roku od osam dana.
- (5) Obrazac i sadržaj obrasca potvrde iz stava 4 ovog člana utvrđuje se pravilnikom koji donosi šef Policije.

### **Član 37**

#### **(Davanje na poslugu oružja)**

- (1) Pištolji i revolveri se ne mogu davati na poslugu drugom licu.
- (2) Lovačko i sportsko oružje može se dati na poslugu drugom fizičkom licu koje ima oružni list za tu vrstu oružja i u slučajevima propisanim u članovima 38 i 39 ovog zakona.
- (3) Oružje iz stava 2 ovog člana ne smije se davati na poslugu maloljetnom licu.

### **Član 38**

#### **(Davanje na poslugu sportskog oružja)**

- (1) Streljačka organizacija i lovačko udruženje može davati na poslugu oružje i municiju samo svojim članovima i to za vrijeme dok vježbaju gađanje ili se takmiče u gađanju na strelištu i na drugom terenu određenom za vježbanje gađanja, odnosno takmičenja u gađanju.
- (2) Streljačka organizacija i lovačko udruženje, ukoliko se njihov magacin ne nalazi na strelištu, dužni su svojim članovima izdati potvrdu za nošenje oružja do strelišta ili terena iz stava 1 ovog člana koja važi samo za dane kada se vježba gađanje, odnosno takmičenje u gađanju.

### **Član 39**

#### **(Davanje na poslugu lovačkog oružja)**

- (1) Pravno lice i preduzetnik iz člana 17 ovog zakona može članovima domaćih i inostranih lovačkih organizacija davati na poslugu lovačko oružje i municiju ukoliko ispunjava sve uslove određene propisima o lovstvu Distrikta.
- (2) Pravno lice i preduzetnik iz stava 1 ovog člana može članovima domaćih i inostranih lovačkih organizacija davati na poslugu lovačko oružje i municiju najduže osam dana, i to samo za lov u lovištu na koje je stekao pravo u skladu s propisima iz lovstva.
- (3) Pravno lice i preduzetnik dužan je odmah, a najkasnije u roku od 48 sati obavijestiti Policiju o davanju lovačkog oružja i municije na poslugu članovima domaćih i inostranih lovačkih organizacija.
- (4) Pravno lice i preduzetnik iz stava 1 ovog člana, za oružje i municiju izdaje potvrdu za nošenje oružja i municije, o čemu vodi evidenciju.
- (5) Lice kome je dato oružje i municija ne smije iznositi oružje i municiju van lovišta iz stava 2 ovog člana.
- (6) Šef Policije utvrđuje pravilnikom obrazac i sadržaj obrasca potvrde i evidencije iz stava 4 ovog člana.

### **Član 40**

#### **(Postupanje u slučaju prestanka potrebe za držanjem oružja i municije)**

- (1) Pravno lice i preduzetnik koji posjeduje oružje i municiju u skladu s ovim zakonom, a kod koga je iz bilo kojih razloga prestala potreba za daljnjim držanjem oružja i municije obavještava o tome Policiju u roku od osam dana od dana prestanka potrebe držanja oružja i municije.

- (2) Policija preuzima oružje i preostalu municiju i odobrenje za držanje oružja i postupa u skladu s članom 50 ovog zakona.
- (3) Policija može odobriti pravnom licu čuvanje oružja i municije do prodaje ako ispunjava uslove utvrđene Pravilnikom o uslovima smještaja i čuvanja oružja i municije.

#### **Član 41**

##### **(Postupanje u slučaju nestanka ili krađe oružja i municije ili isprave o oružju)**

- (1) Pravno i fizičko lice, koje posjeduje oružje i municiju u skladu s ovim zakonom, u slučaju nestanka ili krađe oružja i municije ili isprave o oružju dužno je prijaviti nestanak ili krađu Policiji odmah, a najkasnije u roku od dva sata od saznanja da su oružje i municija nestali ili ukradeni.
- (2) Pravno i fizičko lice dužno je o vlastitom trošku u „Službenom glasniku Brčko distrikta Bosne i Hercegovine“ oglasiti nestanak isprava o oružju, osim nestanka odobrenja za nabavljanje oružja i municije.
- (3) Prijave iz stavova 1 i 2 ovog člana podnose se policiji prema mjestu događaja ili saznanja o nestanku ili krađi oružja i municije.
- (4) U prijavi se navode okolnosti pod kojima su oružje i municija izgubljeni ili ukradeni, a koje su podnosiocu prijave poznati.

#### **Član 42**

##### **(Pronalazak oružja i municije)**

- (1) Lice koje nađe oružje ili municiju ili sazna za skriveno oružje ili municiju dužno je o tome odmah obavijestiti Policiju.
- (2) Ukoliko vlasnik pronađenog oružja ne preuzme oružje u roku od 30 dana od dana obavještanja o pronalasku oružja, sa oružjem će se postupiti u skladu s odredbom članova 46 i 50 ovog zakona.

#### **Član 43**

##### **(Obaveza prijave promjene prebivališta)**

Vlasnik oružja kome je izdata isprava o oružju, a koji promijeni prebivalište, odnosno sjedište, dužan je u roku od 30 dana od dana promjene prebivališta, odnosno sjedišta, prijaviti oružje nadležnoj policijskoj stanici na čijem području je novo prebivalište, odnosno sjedište.

#### **Član 44**

##### **(Postupak s oružjem i municijom u slučaju smrti vlasnika oružja)**

- (1) U slučaju smrti vlasnika oružja i municije punoljetni član njegove porodice, zakonski zastupnik, staratelj, fizičko lice koje je s njim živjelo u zajedničkom domaćinstvu ili fizičko lice kod kojeg se oružje i municija u trenutku smrti nalazi, dužno je odmah po saznanju o postojanju oružja i municije, predati Policiji na čuvanje oružje, municiju i odgovarajuću ispravu izdatu za to oružje.

- (2) Policija o predanom oružju i municiji iz stava 1 ovog člana izdaje potvrdu.
- (3) Nasljednik oružja iz stava 1 ovog člana u roku od 60 dana od dana pravosnažnosti rješenja o nasljeđivanju dužan je:
  - a) oružje prodati ili pokloniti licu koje ima odobrenje za nabavku te vrste oružja;
  - b) podnijeti zahtjev za registraciju oružja;
  - c) onesposobiti oružje, te ga zadržati u skladu s ovim zakonom;
  - d) predati Policiji na uništenje.
- (4) Izuzetno od stava 3 ovog člana, ovlašteni trgovac čuva oružje maloljetnog nasljednika dok ne napuni 21 godinu života.
- (5) Nasljednik iz stava 4 ovog člana sa napunjenom 21 godinom života dužan je s oružjem postupiti na način propisan stavom 3 ovog člana.
- (6) Nasljednik oružja koji oružje proda dužan je oružje objavit u Policiji u roku od osam dana od dana prodaje.

#### **Član 45**

##### **(Postupci s naslijeđenim oružjem i municijom)**

- (1) Nasljedniku oružja koji podnese zahtjev za registraciju naslijeđenog oružja i municije Policija izdaje odgovarajuću ispravu o oružju, ukoliko ispunjava uslove iz člana 10 ovog zakona.
- (2) Oružje koje je nasljednik predao na uništenje, objavljuje se po službenoj dužnosti.
- (3) Ukoliko nasljednik oružja i municije u roku od 60 dana od dana pravosnažnosti rješenja o nasljeđivanju ne postupi u skladu s članom 44 stavom 3 ovog zakona, Policija oduzima oružje i municiju i postupa na način propisan članom 50 ovog zakona.

### **POGLAVLJE IV. ODUZIMANJE ORUŽJA, MUNICIJE I ISPRAVA O ORUŽJU**

#### **Član 46**

##### **(Oduzimanje oružja, municije i isprava o oružju fizičkom i pravnom licu)**

- (1) Oružje, municija i isprave o oružju oduzimaju se od fizičkog lica ako prestane ispunjavati uslove iz člana 10 stava 2 tački b), c), d), i e), člana 10 stava 3 tački a) i c), člana 11 stavova 2 i 3 ovog zakona.
- (2) Oružje, municija i isprave o oružju oduzimaju se od vlasnika oružja koji u roku iz člana 25 stavova 3 i 7 ovog zakona ne podnese zahtjev za produženje važenja isprave o oružju i ne preda oružje, municiju i ispravu o oružju Policiji.
- (3) U slučajevima iz stava 1 ovog člana oduzima se trofejno oružje kao i staro oružje.
- (4) Oružje, municija i isprave o oružju oduzimaju se pravnom licu i preduzetniku ako pravno lice i preduzetnik prestane ispunjavati neki od uslova iz člana 17 stava 1 ovog zakona.

- (5) O slučajevima iz stavova 1, 2, 3 i 4 ovog člana odlučuje šef Policije rješenjem.
- (6) Sa oduzetim oružjem i municijom postupa se u skladu s članom 50 ovog zakona.
- (7) Protiv rješenja iz stava 5 može se izjaviti žalba Apelacionoj komisiji u roku od 15 dana od dana prijema rješenja.
- (8) Žalba ne odgađa izvršenje rješenja.
- (9) Protiv rješenja donesenog po žalbi ne može se voditi upravni spor.

#### **Član 47** **(Vanredni zdravstveni pregled)**

- (1) Policija upućuje vlasnika oružja za kojeg se opravdano sumnja da više nije zdravstveno sposoban za držanje i nošenje oružja na vanredni zdravstveni pregled kod nadležne zdravstvene ustanove iz člana 13 stava 2 ovog zakona.
- (2) Vlasnik oružja iz stava 1 ovog člana dužan je u roku od 15 dana od dana prijema rješenja o upućivanju na vanredni zdravstveni pregled dostaviti Policiji uvjerenje o zdravstvenoj sposobnosti za držanje i nošenje oružja.
- (3) Troškove zdravstvenog pregleda vlasnika oružja iz stava 1 ovog člana koji je proglašen zdravstveno sposobnim za držanje i nošenje oružja snosi Policija.
- (4) Vlasnik oružja iz stava 1 ovog člana za kojeg se na vanrednom zdravstvenom pregledu utvrdi da nije zdravstveno sposoban za držanje i nošenje oružja, sam snosi troškove vanrednog zdravstvenog pregleda.
- (5) Policija oduzima oružje, municiju, oružni list i odobrenje za sakupljanje i držanje starog oružja vlasniku oružja koji je na vanrednom zdravstvenom pregledu ocijenjen nesposobnim za držanje, nošenje i sakupljanje oružja ili koji u roku iz stava 2 ovog člana ne dostavi uvjerenje o zdravstvenoj sposobnosti za držanje, nošenje i sakupljanje oružja.
- (6) O slučajevima iz stavova 1 i 2 ovog člana odlučuje šef Policije rješenjem.

#### **Član 48** **(Privremeno oduzimanje oružja, municije i isprava o oružju)**

- (1) Policijski službenik od vlasnika oružja privremeno oduzima oružje, municiju, dijelove oružja i isprave o oružju ako postoji osnova sumnje da:
  - a) je vlasnik oružja izvršio krivično djelo, osim krivičnoga djela protiv sigurnosti javnog saobraćaja ili prekršaj protiv javnog reda i mira, prekršaj propisan Zakonom o oružju i municiji ili nasilje predviđeno drugim zakonom,
  - b) je sa njima izvršeno krivično djelo ili prekršaj;
  - c) su pribavljeni krivičnim djelom ili prekršajem;
  - d) su nastali izvršenjem krivičnog djela ili prekršaja.

- (2) Oružje, municija i isprave o oružju privremeno se oduzimaju odmah i prije okončanja upravnog, prekršajnog i krivičnog postupka, ako postoje okolnosti koje ukazuju da bi oružje moglo biti zloupotrijebljeno.
- (3) U slučajevima iz stavova 1 i 2 ovog člana policijski službenik dužan je izdati potvrdu o privremeno oduzetim predmetima.

**Član 49**  
**(Čuvanje oduzetog oružja i municije)**

Oduzeto oružje i municija iz člana 46 ovog zakona čuva se u depozitu Policije, do okončanja postupka.

**Član 50**  
**(Postupak s oružjem i municijom oduzetim u upravnom postupku)**

- (1) Oružje i municija koje je oduzeto u pravosnažno okončanom upravnom postupku vlasnik može prodati ili pokloniti fizičkom ili pravnom licu koje posjeduje odobrenje za nabavku te vrste oružja u roku od tri mjeseca od pravosnažnosti rješenja o oduzimanju oružja i municije.
- (2) Oružje i municija koje ne bude prodano ili poklonjeno u roku iz stava 1 ovog člana, uništava se.
- (3) Bliže odredbe o uništenju oružja i municije iz stava 2 ovog člana utvrđuje šef Policije pravilnikom.

**Član 51**  
**(Postupak s oružjem i municijom oduzetim u prekršajnom ili krivičnom postupku)**

S oružjem i municijom oduzetim u pravosnažno okončanom prekršajnom ili krivičnom postupku postupa se u skladu s odlukom Osnovnog suda.

## **POGLAVLJE V. PROMET ORUŽJA I MUNICIJE**

**Član 52**  
**(Uslovi za promet oružja i municije)**

- (1) Prometom oružja i municije kategorija B, C i D može se baviti ovlašteni trgovac oružjem koji:
  - a) ima registrovanu djelatnost prometa oružja i municije u sudskom registru;
  - b) ima odobrenje za obavljanje prometa oružja i municije.
- (2) Zahtjev za izdavanje odobrenja iz stava 1 tačke b) ovog člana ovlašteni trgovac oružjem podnose Policiji.

- (3) Odobrenje iz stava 1 ovog člana Policija izdaje ovlaštenom trgovcu oružjem koji ispunjava sljedeće uslove:
- a) da je registrovan za obavljanje djelatnosti prometa oružja i municije;
  - b) da vlasnik i odgovorno lice u pravnom licu ispunjava uslove iz člana 10 stava 2 tački c), d) i e) i stava 3 tački a) i b) ovog zakona;
  - c) da lice koje neposredno obavlja poslove prometa oružja i municije ima navršenih 18 godina života i da ispunjava uslove iz člana 10 stava 2 tački c) i d) i stava 3 tački a) i b) ovog zakona;
  - d) da ima pravo vlasništva ili pravo korištenja poslovnog prostora u kojem će se obavljati promet oružja i municije;
  - e) da prostor u kojem će se obavljati promet oružja i municije bude uređen u skladu s prostornim i tehničkim uslovima za siguran smještaj i promet oružja i municije.
- (4) Način i uslove za siguran smještaj i čuvanje oružja i municije utvrđuje šef Policije pravilnikom.

### **Član 53**

#### **(Nabavka oružja i municije radi prometa)**

- (1) Ovlašteni trgovac oružjem, oružje i municiju može nabavljati na osnovu posebnog odobrenja za nabavku radi daljnje prodaje.
- (2) Odobrenje iz stava 1 ovog člana izdaje Policija za svaku ugovorenu količinu oružja i municije i važi šest mjeseci od dana izdavanja.
- (3) Zahtjev za izdavanje odobrenja iz stava 1 ovog člana podnosi se Policiji i sadrži:
- a) naziv i adresu prodavača i kupca;
  - b) vrstu i količinu oružja, dijelova za oružje i municije;
  - c) naziv i adresu dobavljača.
- (4) Odobrenje za nabavku oružja i municije iz stava 1 ovog člana neće se izdati ukoliko postoje okolnosti koje ukazuju na ugrožavanje sigurnosti Distrikta.
- (5) Vatreno oružje koje nije ispitano i obilježeno ne može se stavljati u promet.

### **Član 54**

#### **(Prodaja oružja i municije)**

- (1) Ovlašteni trgovac oružjem može prodavati oružje, dijelove za oružje i municiju fizičkom i pravnom licu koji ima odobrenje za nabavljanje tog oružja i municije.
- (2) Ovlašteni trgovac oružjem dužan je:
- a) prilikom prodaje oružja i municije zadržati jedan originalan primjerak odobrenja za nabavljanje oružja i municije, a na drugi primjerak staviti zabilješku o izvršenoj prodaji i ovjeriti vlastitim pečatom i potpisom odgovornog lica;
  - b) u roku od pet dana od dana prodaje pismeno obavijestiti organ koji je izdao odobrenje za nabavljanje oružja i municije.

- (3) Ovlašteni trgovac oružjem može prodavati municiju na osnovu odgovarajuće isprave izdate za to oružje fizičkom licu, koje ima lovačko oružje s neolučenim cijevima i oružje kategorije C.

## **POGLAVLJE VI. POPRAVLJANJE I PREPRAVLJANJE ORUŽJA**

### **Član 55**

#### **(Pravno lice i preduzetnik ovlašteni za popravljanje i prepravljanje oružja)**

- (1) Popravljanjem i prepravljanjem oružja može se baviti pravno lice i preduzetnik koji ima:
- a) registrovanu djelatnost popravljanja i prepravljanja oružja;
  - b) odobrenje Policije.
- (2) Odredbe člana 52 stavova 2 i 3 ovog zakona analogno se primjenjuju na pravno lice i preduzetnika iz stava 1 ovog člana.
- (3) Bliže odredbe o popravljenom i prepravljenom oružju utvrđuju se pravilnikom koji donosi šef Policije.

### **Član 56**

#### **(Oružje koje može biti predmet popravljanja i prepravljanja)**

Pravno lice i preduzetnik iz člana 55 ovog zakona može primiti radi popravljanja i prepravljanja samo oružje za koje je izdata odgovarajuća isprava o oružju.

## **POGLAVLJE VII. CIVILNA STRELIŠTA**

### **Član 57**

#### **(Uslovi za osnivanje civilnih strelišta)**

- (1) Civilno strelište za obavljanje sportske djelatnosti (u daljnjem tekstu: „civilno strelište“) može osnovati pravno lice i preduzetnik koji:
- a) ima registrovanu djelatnost,
  - b) ima odobrenje Policije.
- (2) Odredbe člana 52 stavova 1 i 3 ovog zakona analogno se primjenjuju na odgovarajući način i na pravno lice i preduzetnika iz stava 1 ovog člana.
- (3) Odredbe ovog zakona ne primjenjuju se na lovačka strelišta koja pravna lica registrovana za obavljanje djelatnosti lova u okviru lovišta upotrebljavaju za gađanje i isprobavanje lovačkog oružja svojih članova prema propisima o lovstvu.
- (4) Bliže odredbe o prostornim i tehničkim uslovima civilnih strelišta utvrđuju se pravilnikom koji donosi šef Policije.

### **Član 58**

#### **(Upotreba oružja na strelištu)**



- (1) Vatreno oružje na civilnom strelištu može koristiti fizičko lice kojem je izdata odgovarajuća isprava o oružju.
- (2) Fizičko lice koje ne ispunjava uslove iz stava 1 ovog člana, gađanje može izvoditi samo pod nadzorom ovlaštenog lica civilnog strelišta i isključivo s oružjem i municijom koje je vlasništvo civilnog strelišta.
- (3) Ovlašteno lice civilnog strelišta zabranjuje izvođenje gađanja i pristup licima iz stavova 1 i 2 ovog člana, ako su pod dejstvom alkohola i narkotika ili ako njihovo psihofizičko stanje ukazuje na nesposobnost rukovanja oružjem.

#### **Član 59**

##### **(Nabavka oružja i municije za potrebe strelišta)**

- (1) Pravno lice i preduzetnik iz člana 57 stava 1 ovog zakona može nabavljati oružje i municiju radi gađanja na civilnom strelištu, u skladu s članovima 17 i 18 ovog zakona.

### **POGLAVLJE VIII. MEHANIČKI TRAG ORUŽJA**

#### **Član 60**

##### **(Uzimanje mehaničkog traga registrovanog oružja)**

- (1) Fizičko i pravno lice koje ima registrovano oružje na teritoriji Distrikta i pravno i fizičko lice kome je oružje povjereno na čuvanje, dužno je na poziv Policije donijeti oružje radi uzimanja mehaničkog traga i unosa u propisanu evidenciju.
- (2) Za uzimanje mehaničkog traga oružja iz stava 1 ovog člana ne naplaćuje se naknada.
- (3) Oružje fizičkog i pravnog lica kojem, zbog tehničke neispravnosti, nije bilo moguće uzeti mehanički trag, vlasnik može o svom trošku trajno onesposobiti ili predati na uništenje u skladu s ovim zakonom.
- (4) Šef Policije imenuje komisiju za obavljanje poslova iz stava 1 ovog člana.

### **POGLAVLJE IX. NADZOR**

#### **Član 61**

##### **(Nadzor)**

Nadzor nad primjenom ovog zakona provodi Policija.

#### **Član 62**

##### **(Ovlaštenja lica koje vrši neposredni nadzor)**

- (1) U obavljanju nadzora iz člana 61 ovog zakona Policija je ovlaštena da:
- a) pregleda i kontroliše skladište oružja i municije, civilno strelište i druge prostorije gdje se obavlja promet, popravlja, prepravlja i čuva oružje i municija, da vrši pregled propisanih evidencija i ostale dokumentacije u vezi s prometom, popravljanjem i prepravljanjem oružja i vođenje civilnog strelišta;
  - b) privremeno zabrani obavljanje djelatnosti prometa i popravljanja ili prepravljanja oružja, upotrebu civilnog strelišta i naredi da se utvrđene nepravilnosti otklone u određenom roku;
  - c) zabrani daljnje obavljanje prometa, popravljanja ili prepravljanja oružja, odnosno upotrebu civilnog strelišta ako utvrdi da je u obavljanju tih djelatnosti učinjen teži propust u preduzimanju zaštitnih ili drugih sigurnosnih mjera ili druge teže kažnjive radnje, ukoliko je prestao jedan od uslova pod kojima je odobrenje izdato ili ako se ne postupi po nalogu Policije;
  - d) naredi preduzimanje i drugih propisanih mjera.
- (2) Pravno i fizičko lice dužno je omogućiti obavljanje nadzora i dati na uvid traženu dokumentaciju kao i pružiti potrebne podatke i obavijesti.

## **POGLAVLJE X. EVIDENCIJE**

### **Član 63 (Evidencije Policije)**

- (1) Policija vodi evidencije o:
- a) odobrenju za nabavku oružja;
  - b) odobrenju za nabavku municije;
  - c) oružnom listu;
  - d) dozvoli za nošenje oružja;
  - e) odobrenju za držanje oružja pravnog lica;
  - f) odobrenju za sakupljanje i držanje starog oružja i odobrenju za držanje trofejnog oružja;
  - g) potvrdi za prijavljeno oružje;
  - h) oduzetom, nađenom i predanom oružju i municiji;
  - i) nestalom oružju;
  - j) mehaničkom tragu oružja;
  - k) optičkom nišanu.
- (2) Lični podaci sadržani u evidencijama iz ovoga člana prikupljaju se, pohranjuju i obrađuju u skladu s odredbama propisa kojima se uređuje zaštita ličnih podataka.
- (3) Sadržaj i način vođenja evidencije iz stava 1 ovog člana utvrđuju se pravilnikom, koji donosi šef Policije.

### **Član 64 (Evidencije pravnih i fizičkih lica)**

- (1) Sportska streljačka organizacija i pravno lice registrovano za obavljanje djelatnosti lova, i drugo pravno lice koje je oružje i municiju nabavilo i registrovalo radi obavljanja svoje djelatnosti, dužno je voditi evidenciju o:
  - a) nabavljenom oružju i municiji;
  - b) izdatim potvrdama za nošenje oružja i municije.
  
- (2) Ovlašteni trgovac oružjem dužan je voditi evidencije o:
  - a) nabavljenom oružju i municiji;
  - b) prodatom oružju;
  - c) prodatoj municiji;
  - d) oružju i municiji primljenom na čuvanje.
  
- (3) Pravno lice i preduzetnik ovlašten za popravku i prepravku oružja dužan je voditi evidenciju o popravljenom i prepravljenom oružju.
  
- (4) Pravno lice i preduzetnik ovlašten za vođenje civilnog strelišta dužan je voditi evidencije o:
  - a) nabavljenom oružju i municiji;
  - b) oružju i municiji ustupljenoj na korištenje i utrošenoj municiji.
  
- (5) Pravno i fizičko lice kojem je izdato odobrenje za sakupljanje i držanje starog oružja i držanje trofejnog oružja dužno je voditi evidenciju o sakupljenom i trofejnom oružju.
  
- (6) Evidencije iz stavova 1, 2, 3, 4, i 5 ovog člana čuvaju se trajno, a u slučaju smrti fizičkog lica, odnosno prestanka postojanja pravnog lica ili preduzetnika, evidencije se predaju Policiji.
  
- (7) Sadržaj i način vođenja evidencije iz stava 6 ovog člana utvrđuju se pravilnikom koji donosi šef Policije.

## **POGLAVLJE XI. KAZNE NE ODREDBE**

### **ODJELJAK A. KRIVIČNO DJELO**

#### **Član 65**

##### **(Neovlaštena nabavka, držanje ili prodaja oružja ili bitnih dijelova za oružje)**

- (1) Tko bez važeće isprave o oružju nabavi, drži, nosi ili proda oružje ili bitne dijelove za oružje kategorije B, kaznit će se novčanom kaznom ili kaznom zatvora do jedne godine.
  
- (2) Ako je predmet djela iz stava 1 ovog člana veća količina oružja ili bitnih dijelova za oružje kategorije B, počinitelj će se kazniti kaznom zatvora od šest mjeseci do pet godina.
  
- (3) Oružje i bitni dijelovi za oružje oduzet će se.

### **ODJELJAK B. PREKRŠAJI**

**Član 66**  
**(Novčana kazna od 1.200,00 do 1.500,00 KM**  
**i zaštitna mjera za prekršaje fizičkih lica)**

- (1) Novčanom kaznom od 1.200,00 KM do 1.500,00 KM kaznit će se fizičko lice za prekršaj ako:
- a) nabavi, drži i nosi oružje kategorije C, zračno oružje i električne paralizatore iz kategorije D bez odgovarajuće isprave (član 7 stav 4);
  - b) lice mlađe od 18 godina nabavi, drži i nosi oružje kategorije D (član 7 stav 5);
  - c) lice mlađe od 16 godina nabavi, drži i nosi raspršivač, odnosno sprej (član 7 stav 5);
  - d) nosi i upotrebljava staro ili trofejno oružje i nabavlja, drži ili pravi municiju za to oružje (član 27 stav 5);
  - e) osposobi za upotrebu vatreno oružje koje je bilo onesposobljeno (član 27 stav 7),
  - f) proda oružje kategorije C, zračno oružje i električne paralizatore iz kategorije D, fizičkom licu mlađem od 18 godina (član 28 stav 1);
  - g) nosi oružje za ličnu sigurnost bez dozvole za nošenje oružja (član 31 stav 1);
  - h) nosi oružje na javnim, vjerskim i sportskim okupljanjima, u školama, zdravstvenim i javnim ustanovama, ugostiteljskim objektima i prostorima koji se koriste za pružanje ugostiteljskih usluga (član 31 stav 5);
  - i) nosi oružje pod uticajem alkohola, opojnih droga i drugih omamljujućih sredstava (član 31 stav 6);
  - j) nosi oružje na javnom mjestu na način kojim može izazvati osjećanje fizičke ugroženosti, uznemirenosti i negodovanja građana (član 31 stav 7);
  - k) ne čuva oružje i municiju na način da nije dostupno drugom licu, posebno djeci, zaključano i odvojeno u metalnom ormaru, sefu ili sličnom spremištu koje se ne može otvoriti alatom uobičajene upotrebe (član 32 stav 1);
  - l) ne čuva oružje i municiju u stambenom ili drugom odgovarajućem prostoru koji se nalazi u mjestu prebivališta, odnosno sjedišta vlasnika oružja i municije (član 32 stav 2);
  - m) upotrebljava oružje na javnim mjestima i drugim mjestima čime može ugroziti sigurnost ljudi (član 35 stav 2);
  - n) upotrebljava lovačko oružje izvan lovišta ili civilnih strelišta (član 35 stav 3);
  - o) električni paralizator i raspršivač, odnosno sprej iz kategorije D, upotrebljava na način da se time ugrožava sigurnost drugih lica (član 35 stav 8);
  - p) nosi oružje i municiju kada ne obavlja poslove zaštite, van objekta ili područja koje osigurava ili čuva (član 36 stav 2);
  - r) pištolj i revolver daje na posluhu drugom licu (član 37 stav 1);
  - s) da na posluhu lovačko i sportsko oružje fizičkom licu koje nema oružni list za tu vrstu oružja (član 37 stav 2);
  - t) ne obavijesti Policiju o pronalasku oružja i municije (član 42 stav 1);
  - u) vlasnik koji nakon upućivanja na vanredni zdravstveni pregled ne dostavi Policiji ljekarsko uvjerenje u propisanom roku (član 47 stav 2);
  - v) ne omogući obavljanje nadzora i uvida u traženu dokumentaciju kao i ne pruži potrebne podatke i obavijesti (član 62 stav 2);
  - z) ne osigura uslove smještaja i čuvanja oružja i municije (član 79).

- (2) Za prekršaj iz stava 1 ovog člana obavezno se izriče i zaštitna mjera oduzimanja oružja, bitnih dijelova oružja i municije.
- (3) U izvršenju zaštitne mjere iz stava 2 ovog člana oduzima se i isprava o oružju.

### **Član 67**

#### **(Novčana kazna od 800,00 KM do 1.200,00 KM i zaštitna mjera za prekršaje fizičkih lica)**

- (1) Novčanom kaznom od 800,00 KM do 1.200,00 KM kaznit će se fizičko lice za prekršaj, ako:
- a) ne dopusti policijskom službeniku da utvrdi postojanje uslova za siguran smještaj i čuvanje oružja (član 12 stav 2);
  - b) u propisanom roku ne podnese zahtjev za registraciju oružja i izdavanje oružnog lista, odnosno odobrenja za držanje oružja (član 22 stav 1);
  - c) u propisanom roku ne podnese zahtjev za produženje isprave o oružju (člana 25 stav 3);
  - d) ne preda oružje Policiji po isteku roka za produženje važnosti isprave o oružju (član 25 stav 7);
  - e) proda ili preda staro i trofejno oružje fizičkom ili pravnom licu koje nema odgovarajuće isprave i ako ne obavijesti u propisanom roku Policiju o izvršenoj nabavci, odnosno prodaji ili predaji (član 27 stav 6);
  - f) ne prijavi Policiji nabavku oružja kategorije C, zračnog oružja i električnog paralizatora u propisanom roku (član 28 stav 2);
  - g) ne prijavi nabavku, otuđenje, nestanak i gubljenje optičkog nišana u propisanom roku (član 28 stav 5);
  - h) vatreno oružje koje je onesposobljeno osposobi za upotrebu (član 29 stav 10);
  - i) sa oružjem i municijom ne postupa s naročitom pažnjom (član 30);
  - j) nosi oružje na način kojim se ugrožava lična sigurnost ili sigurnost drugih lica (član 31 stav 2);
  - k) prenosi oružje radi popravljivanja, prepravljivanja, onesposobljavanja ili upotrebe na strelištu suprotno ovom zakonu (član 31 stav 3);
  - l) van lovišta, odnosno strelišta drži, odnosno nosi oružje bez futrole ili kovčega i koje je napunjeno (član 31 stav 4);
  - m) na poziv Policije ne donese oružje na pregled (član 32 stav 3);
  - n) ne prijavi predaju oružja i municije na čuvanje (član 34 stav 2);
  - o) ne održava oružje u ispravnom stanju i ne rukuje njime pravilno (član 35 stav 1);
  - p) upotrebljava sportsko oružje izvan civilnih i sportskih strelišta (član 35 stav 4);
  - r) zračno oružje i luk upotrebljava na mjestima koja mogu ugroziti sigurnost građana (član 35 stav 5);
  - s) zračno oružje i luk da na upotrebu djeci mlađoj od 11 godina na sportskim strelištima i drugim mjestima određenim i uređenim za vježbe gađanja bez nadzora trenera (član 35 stav 7);
  - t) ne pristupi vanrednom ljekarskom pregledu (član 47 stav 1);
  - u) na poziv Policije ne donese oružje radi uzimanja mehaničkog traga i unosa u evidencije (član 60 stav 1);
  - v) ne zamijeni ispravu o oružju u propisanom roku (član 75 stav 1);
  - z) ne zamijeni ispravu o oružju u propisanom roku (član 75 stav 2).

- 2) Za prekršaj iz stava 1 tački d), f), g), h), j), k), m), n), p), r), s), t), u) i v) ovog člana obavezno se izriče i zaštitna mjera oduzimanja oružja, bitnih dijelova oružja i municije i isprava o oružju.

### **Član 68**

#### **(Novčana kazna od 500,00 do 1.000,00 KM i zaštitna mjera za prekršaje fizičkih lica)**

(1) Novčanom kaznom od 500,00 KM do 1.000,00 KM kaznit će se fizičko lice za prekršaj, ako:

- a) ne obavijesti Policiju o promjeni zdravstvenog stanja vlasnika oružja, a koje može da utiče na sposobnost za držanje i nošenje oružja (član 14);
- b) u propisanom roku ne vrati odobrenje za nabavku oružja (član 21 stav 2);
- c) u propisanom roku ne vrati odobrenje za nabavku municije koje nije iskorišteno (član 26 stav 7);
- d) u određenom roku ne obavijesti Policiju o prodaji oružja (član 29 stav 3);
- e) u određenom roku ne obavijesti Policiju o izvršenoj zamjeni oružja i ne podnese zahtjev za registraciju (član 29 stav 5);
- f) ne prijavi trajno onesposobljeno oružje Policiji (član 29 stav 9);
- g) ne preda Policiji oružje za koje ne postoji mogućnost popravke i prepravke (član 33 stav 1);
- h) napušta mjesto prebivališta duže od šest mjeseci, a ne preda na čuvanje oružje i municiju fizičkom licu koje posjeduje oružni list ili ovlaštenom trgovcu oružja (član 34 stav 1);
- i) član streljačke organizacije koji nosi oružje bez potvrde za nošenje oružja do strelišta ili terena gdje se vrši vježba gađanja, odnosno takmičenja u gađanju (član 38 stav 2);
- j) iznosi oružje i municiju van lovišta (član 39 stav 5);
- k) u roku ne prijavi nestanak ili krađu oružja ili municije (član 41 stav 1);
- l) u propisanom roku ne prijavi promjenu prebivališta (član 43);
- m) u slučaju smrti vlasnika oružja i municije, ne preda oružje, municiju i odgovarajuću ispravu Policiji (član 44 stav 1);
- n) nasljednik oružja i municije u propisnom roku ne proda ili pokloni oružje i municiju, ne podnese zahtjev za registraciju, onesposobi oružje ili ne preda na uništenje Policiji (član 44 stav 3);
- o) lice koje napuni 21 godinu života naslijeđeno oružje ne proda ili pokloni, ne podnese zahtjev za registraciju, onesposobi ili ne preda na uništenje oružje Policiji (član 44 stav 5);
- p) ne odjavi oružje koje je prodao (član 44 stav 6);
- r) ne vodi evidenciju o sakupljenom starom oružju i držanju trofejnog oružja (član 64 stav 5);
- s) ne prijavi Policiji posjedovanje oružja kategorije C, zračnog oružja i električnog paralizatora iz kategorije D (član 76).

(2) Za prekršaj iz stava 1 tački e), f), g), h), j), l), m), n), o) i s) ovog člana izriče se i zaštitna mjera oduzimanja oružja i municije i isprava o oružju i municiji.

**Član 69**  
**(Novčana kazna od 10.000,00 do 15.000,00 KM**  
**i zaštitna mjera za prekršaje pravnih lica i preduzetnika)**

(1) Novčanom kaznom od 10.000,00 do 15.000,00 KM kaznit će pravno lice i preduzetnik, ako:

- a) u propisanom roku ne podnese zahtjev za izdavanje odobrenja za držanje oružja (član 22 stav 2);
- b) ne obavijesti Policiju o prodaji oružja i municije u propisanom roku (član 29 stav 2);
- c) ne obavijesti Policiju o prodaji oružja i ne odjavi oružje u propisanom roku (član 29 stav 3);
- d) osposobi oružje koje je onesposobljeno za upotrebu (član 29 stav 10);
- e) ne drži i ne čuva oružje i municiju na način da nije dostupno drugim licima, posebno djeci, zaključano i odvojeno u metalnom ormaru, drvenom ormaru, sefu ili sličnom spremištu (član 32 stav 1);
- f) ne čuva oružje u stambenom ili drugom odgovarajućem prostoru koje se nalazi u mjestu prebivališta, odnosno sjedišta vlasnika oružja (član 32 stav 2);
- g) izda djeci oružje na upotrebu (član 35 stav 6);
- h) izda zračno oružje ili luk na upotrebu djeci mlađoj od 11 godina na sportskom strelištu ili na drugim mjestima bez nadzora trenera (član 35 stav 7);
- i) povjeri nošenje oružja i municije fizičkom licu koje ne obavlja poslove zaštite i ne ispunjava uslove iz člana 10 ovog zakona (član 36 stav 1);
- j) lovačko i sportsko oružje da na poslugu licu koje nema oružni list za tu vrstu oružja (član 37 stav 2);
- k) streljačka organizacija ili lovačko udruženje da na poslugu oružje i municiju licu koje nije član streljačke organizacije ili lovačkog udruženja (član 38 stav 1);
- l) izda na poslugu lovačko oružje i municiju članovima domaćih i inostranih lovačkih organizacija, a ne ispunjava sve uslove određene propisima o lovstvu Distrikta (član 39 stav 1);
- m) izda na poslugu lovačko oružje i municiju članovima domaćih i inostranih lovačkih organizacija na period duži od 8 dana (član 39 stav 2);
- n) ne obavijesti Policiju u roku o izdavanju lovačkog oružja i municije članovima domaćih i inostranih lovačkih organizacija (član 39 stav 3);
- o) ne izda potvrdu za nošenje oružja i municije i ne vodi evidenciju (član 39 stav 4);
- p) ne obavijesti u roku Policiju o prestanku potrebe za daljnjim držanjem oružja i municije (član 40 stav 1);
- r) se bavi prometom oružja i municije bez odobrenja Policije (član 52 stav 1);
- s) se bavi popravljanjem i prepravljanjem oružja bez odobrenja Policije (član 55 stav 1);
- t) radi popravljavanja i prepravljavanja primi oružje za koje nije izdata odgovarajuća isprava (član 56);
- u) bez odobrenja Policije pusti u rad civilno strelište (član 57 stav 1);
- v) na civilnom strelištu da vatreno oružje na korištenje fizičkom licu koje nema odgovarajuću ispravu o oružju (član 58 stav 1);
- z) dozvoli licu koje nema odgovarajuću ispravu o oružju da koristi civilno strelište bez nadzora ovlaštenog lica strelišta (član 58 stav 2);
- aa) dozvoli licu pod dejstvom alkohola i narkotika pristup civilnom strelištu i omogući mu izvođenje gađanja (član 58 stav 3).

- (2) Za prekršaj iz stava 1 tački a), d), e), f), g), h), i), j), k), l), m), n), o), p), r), s), t), u), v), z) i aa) ovog člana izriče se i zaštitna mjera oduzimanja oružja i municije.
- (3) Za prekršaje iz stava 1 ovog člana kaznit će se novčanom kaznom od 2.000,00 KM do 3.000,00 KM odgovorno lice u pravnom licu.
- (4) Za prekršaje iz stava 1 ovog člana, uz novčanu kaznu, izriče se i zaštitna mjera zabrane obavljanja djelatnosti prometa, popravljivanja i prepravljivanja oružja ili vođenja civilnog strelišta, u trajanju od šest mjeseci.

### **Član 70**

#### **(Novčana kazna od 5.000,00 do 10.000,00 KM za prekršaje pravnih lica i preduzetnika)**

- (1) Novčanom kaznom od 5.000,00 KM do 10.000,00 KM kaznit će se pravno lice i preduzetnik ako:
- a) odmah po saznanju ne obavijesti Policiju o promjeni zdravstvenog stanja vlasnika oružja, a koja može uticati na sposobnost za držanje i nošenje oružja (član 14);
  - b) u propisanom roku ne vrati odobrenje za nabavku oružja (član 21 stav 2);
  - c) bez odobrenja sakuplja i drži staro i trofejno oružje (član 27 stav 1);
  - d) ne prijavi nabavku oružja kategorije C, zračnog oružja i električnog paralizatora i iz kategorije D (član 28 stav 2);
  - e) ne izda potvrdu vlasniku oružja o onesposobljavanju oružja (član 29 stav 7);
  - f) na poziv Policije ne donese oružje na pregled (član 32 stav 3);
  - g) ne preda dotrajalo oružje koje može ugroziti sigurnost ljudi, a bez mogućnosti popravke ili prepravke (član 33 stav 1);
  - h) ne preda Policiji zamijenjene tehnički neispravne dijelove (član 33 stav 4);
  - i) ne izda potvrdu fizičkom licu kome povjerava oružje i o izdanoj potvrdi ne obavijesti Policiju (član 36 stav 4);
  - j) streljačka organizacija ili lovačko udruženje ne izda potvrdu za nošenje oružja do strelišta (član 38 stav 2);
  - k) u roku ne prijavi nestanak ili krađu oružja i municije (član 41 stav 1);
  - l) u roku ne prijavi promjenu sjedišta (član 43);
  - m) proda municiju za lovačko oružje s neolučenim cijevima i oružje kategorije C bez odgovarajuće isprave izdate za to oružje (član 54 stav 3);
  - n) ne vodi propisane evidencije (član 64);
  - o) ne zamijeni u propisanom roku ispravu o oružju (član 75 stav 1);
  - p) ne osigura u propisanom roku uslove smještaja i čuvanja oružja i municije (član 79).
- (2) Za prekršaj iz stava 1 tački c), d), g), h), n), o) i p) ovog člana, izriče se i zaštitna mjera oduzimanja oružja i municije i isprave o oružju.
- (3) Za prekršaje iz stava 1 ovog člana kaznit će se novčanom kaznom od 1.000 KM do 3.000 KM odgovorno lice u pravnom licu.



## **Član 71**

### **(Oduzimanje oružja u slučaju vođenja krivičnog ili prekršajnog postupka)**

- (1) Za krivična djela iz člana 65 te prekršaj iz članova 66, 67, 68, 69 i 70 ovog zakona, oružje i municija oduzet će se i u slučaju da se postupak okonča presudom, odnosno rješenjem kojim se okrivljeni ne oglašava krivim ako to zahtijevaju interesi javne ili opće sigurnosti.
- (2) Nadležni sud, kod kojeg je postupak okončan, donosi posebno rješenje o oduzimanju oružja i municije iz stava 1 ovoga člana.
- (3) Po okončanju postupaka provedenih po odredbama članova 65, 69 i 70 ovog zakona postupa se po rješenju suda.

## **DIO TREĆI – PRELAZNE I ZAVRŠNE ODREDBE**

## **Član 72**

### **(Predaja minsko-eksplozivnih sredstava, oružja i municije)**

- (1) Fizičko i pravno lice, koje posjeduje minsko-eksplozivna sredstva, oružje i municiju koji su zaostali iz ratnog perioda, a koji su zakonom zabranjeni, može takva minsko-eksplozivna sredstva, oružje i municiju dobrovoljno da prijavi radi predaje Policiji.
- (2) Policijski službenik preuzima minsko-eksplozivna sredstva, oružje i municiju iz stava 1 ovog člana, na mjestu na kome se ono nalazi.
- (3) O vrsti i količini predatih minsko-eksplozivnih sredstava, oružja i municije iz stava 2 ovog člana, policijski službenik izdaje odgovarajuću potvrdu.
- (4) Policija je dužna voditi posebnu evidenciju svih primljenih minsko-eksplozivnih sredstava, oružja i municije.
- (5) Pod dobrovoljnom predajom minsko-eksplozivnih sredstava, oružja i municije podrazumijeva se fizička predaja minsko-eksplozivnih sredstava i oružja od strane fizičkog lica ili pravnog lica prilikom koje je jasno izražena namjera lica koja ih predaju Policiji, o trajnom ustupanju bez naknade.
- (6) Ako protiv lica iz stava 1 ovog člana prije dobrovoljne predaje nije pokrenut krivični postupak, odnosno prekršajni postupak zbog nedozvoljenog držanja minsko-eksplozivnih sredstava i oružja, postupak se neće pokrenuti.

## **Član 73**

### **(Legalizacija oružja)**

- (1) Građani mogu legalizovati oružje za koje nemaju oružni list, a koje se prema ovom zakonu može registrovati, u skladu s odlukom o predaji oružja.

- (2) Odluku iz stava 1 ovog člana donosi gradonačelnik Distrikta na prijedlog šefa Policije.
- (3) Prilikom predaje oružja Policiji, lica iz stava 1 ovog člana mogu podnijeti zahtjev za izdavanje oružnog lista, odnosno odobrenja za držanje trofejnog oružja, ukoliko se za tu vrstu oružja, u skladu s ovim zakonom, može izdati oružni list, odnosno odobrenje za držanje trofejnog oružja.
- (4) Do okončanja postupka po podnesenom zahtjevu iz stava 2 ovog člana oružje se čuva u Policiji.
- (5) Oružni list se neće izdati licu koje ne ispunjava uslove iz člana 10 ovog zakona, kao i kada se predato oružje potražuje od strane policijskih organa.
- (6) Ako nakon provedenog postupka licu ne bude izdat oružni list, odnosno odobrenje za držanje trofejnog oružja, oružje se uništava.

#### **Član 74** **(Podzakonski akti)**

- (1) Šef Policije je dužan u roku od šest mjeseci od dana stupanja na snagu ovog zakona donijeti pravilnike o:
  - a) radu Komisije za odlučivanje po podnesenom zahtjevu za nabavku i nošenje oružja i municije (član 10 stav 6);
  - b) programu obuke i načinu osposobljavanja za pravilno rukovanje, držanje i nošenje oružja (član 15 stav 5);
  - c) načinu i uslovima za siguran smještaj i čuvanje oružja i municije (član 17 stav 4, član 32 stav 4 i član 52 stav 4);
  - d) obrascu zahtjeva za izdavanje odobrenja za nabavku oružja, obrascu, sadržaju obrasca oružnog lista, dozvole za nošenje oružja, obrasca za prijavu i potvrde o prijavljenom oružju i potvrde koju pravna lica izdaju fizičkom licu kojim daju oružje u svrhu zaštite imovine (član 9 stav 2), (član 22 stav 5, član 28 stav 7, član 36 stav 5 i član 39 stav 4);
  - e) uništenju oružja i municije (član 50 stav 3);
  - f) uslovima koje moraju da ispunjavaju lica registrovana za obavljanje djelatnosti popravljanja i prepravljanja oružja;
  - g) prostornim i tehničkim uslovima civilnih strelišta (član 57 stav 4);
  - h) sadržaj i način vođenja evidencija (član 63 stav 3, član 64 stav 7).
- (2) Šef Odjeljenja je dužan u roku od tri mjeseca od dana stupanja na snagu ovog zakona donijeti Pravilnik o utvrđivanju zdravstvene sposobnosti za nabavljanje, držanje i nošenje oružja iz člana 13 stava 6.

#### **Član 75** **(Zamjena isprava o oružju)**

- (1) Lice koje u trenutku stupanja na snagu ovog zakona, ima ispravu o oružju, dužno je do isteka roka važnosti isprave o oružju, podnijeti zahtjev za izdavanje nove isprave o oružju.

- (2) Lice koje u trenutku stupanja na snagu ovog zakona ima ispravu o oružju koja je izdata do 6. 12. 2002. godine dužno je u roku od dvije godine, od dana stupanja na snagu ovoga zakona podnijeti zahtjev za izdavanje nove isprave o oružju.
- (3) Postupak iz stava 1 ovog člana provodi se u skladu s članom 25 ovog zakona.
- (4) Ukoliko lice ne postupi u skladu sa stavovima 1 i 2 ovog člana, primijenit će se odredbe člana 46 stava 2 ovog zakona.
- (5) Lice iz stavova 1 i 2 ovog člana zadržava pravo na držanje oružja do isteka roka važnosti isprave o oružju.
- (6) Lice iz stava 1 ovog člana koje želi da nosi oružje za ličnu bezbjednost obavezno je da postupi u skladu s članom 24 ovog zakona.

**Član 76**  
**(Obaveza prijave oružja)**

Fizičko lice koje posjeduje oružje iz člana 28 ovog zakona, dužno je takvo oružje prijaviti Policiji u roku 90 dana od dana stupanja na snagu ovog zakona.

**Član 77**  
**(Usklađivanje obavljanja djelatnosti)**

- (1) Pravno lice i preduzetnik koji obavlja djelatnost prometa oružja i municije, popravljanja i prepravljanja oružja ili vođenje civilnih strelišta, dužno je svoje poslovanje uskladiti s odredbama ovog zakona u roku od šest mjeseci od dana stupanja na snagu ovog zakona.
- (2) Pravnom licu i preduzetniku iz stava 1 ovog člana, koji u roku iz stava 1 ovog člana ne podnese zahtjev Policiji s ciljem usklađivanja poslovanja s odredbama ovog zakona, Policija će rješenjem zabraniti daljnje obavljanje djelatnosti.

**Član 78**  
**(Primjena odredbi člana 19 ovog zakona)**

Odredbe člana 19 ovog zakona ne odnose se na lica koja imaju registrovano oružje prije stupanja na snagu ovog zakona.

**Član 79**  
**(Primjena odredbi člana 32 ovog zakona)**

Pravno i fizičko lice koje posjeduje registrovano vatreno oružje dužno je u roku od godinu dana, od dana stupanja na snagu ovog zakona, osigurati uslove smještaja i čuvanja oružja i municije u skladu s članom 32 ovog zakona.

**Član 80**  
**(Stavljanje van snage)**

Danom stupanja na snagu ovog zakona stavlja se van snage Zakon o oružju i municiji u Brčko distriktu BiH (Službeni glasnik Brčko distrikta Bosne i Hercegovine, brojevi 17/02, 23/03 i 25/05).

### **Član 81**

#### **(Rješavanje zahtjeva prije stupanja na snagu ovog zakona)**

Svi postupci koji do dana stupanja na snagu ovog zakona nisu pravosnažno okončani, završit će se po odredbama ovog zakona.

### **Član 82**

#### **(Stupanje na snagu)**

Ovaj zakon stupa na snagu osmog dana od dana objavljivanja u Službenom glasniku Brčko distrikta Bosne i Hercegovine.

Broj: 01-02-461/11  
Brčko, 12. oktobra 2011. godine

PREDSJEDNIK  
SKUPŠTINE BRČKO DISTRIKTA BiH

**Esad Atić**